

Saksprotokoll i Ungdommens fylkesutval - 17.09.2014

Vedtak

Ungdommens fylkesutval vedtek å sende følgjande til økonomiavdelinga i samband med budsjett for Ungdommens fylkesting 2015:

Ungdommens fylkesting har vore snart to år under Hordaland fylkeskommune og byrjar å sjå kva økonomiske ramar det er naturleg at eit slikt organ har til rådighet innafor den nye strukturen. Vi ser at Ungdommens fylkesting på nokre områder har fått meir midlar da løn til sekretariat nå er teken ut frå vårt budsjett. På andre sida har vi og fått ein auke i aktivitet under fylkeskommunen. Dette er ein positiv auke som vi har jobba for å få til, men det krev noko meir av dei økonomiske ressursane. I tillegg er vi nå bunde av fylkeskommunale avtalar som er dyrare enn det vi tidlegare har vore vane til, noko som og krev meir økonomisk. Det betyr at summen på 230 000 kr er noko stram for aktivitetsnivået i inneverande år.

Nytt for 2015 er at Ungdommens fylkesutval ønskjer å arrangere eit Ungdommens fylkesting som varar over tre dagar, til skilnad frå over to som har vore standard tidlegare. Ein slik organisering liknar det andre fylkar gjer, samt at det vil føre til ein mykje betre prosess på fylkestinget der ein ikkje har så mykje hastverk og der deltakarane kan få betre innføring i kva som ventar dei. Resultatet vil vere betre politikk og eit betre Ungdommens planprogram for Ungdommens fylkesutval å styre etter i året som kjem. Det har vore praksis at deltakarane betalar ein eigenandel som og i 2015 vil dekke det meste av kostnadane, men Ungdommens fylkesting har subsidiert noko.

I Ungdommens planprogram for 2014 står:

«Medverknadsorgan for ungdom skal lovfestast på kommunalt, fylkeskommunalt og nasjonalt nivå. Gjennom desse organa skal ungdom ha reell innflytelse. Dei tre nivåa skal med utgangspunkt i ungdomsrådskanalen henge saman og byggje på kvarandre. Medverknadsorgana på fylkeskommunalt og nasjonalt nivå skal velje eit arbeidsutval som skal arbeide gjennom året. Retningslinjene skal utarbeidast i samarbeid med ungdom.

- *UFU skal arbeide aktivt, og helst saman med andre fylkeskommunale medverknadsorgan, for å fremje saka.*
- *UFU vil vere ein bidragsytar for å vere med å utarbeide retningslinjer for medverknadsorgana.»*

I samband med dette punktet har Ungdommens fylkesutval vore i kontakt med andre fylkar og det vert sett saman ein arbeidsgruppe for å arbeide fram eit forslag til nasjonalt medverknadsorgan der Hordaland vil ha ein representant. Reisekostnadar til ein slik arbeidsgruppe vil derfor kome i tillegg til det budsjettet som ligg til grunn nå.

Da vi elles reknar med å ha same aktivitetsnivå i 2015 som i 2014 ser vi trong for eit auka budsjett og vil derfor be økonomiavdelinga om å auke summen til Ungdommens fylkesutval med 40 000 kr, slik at den vert 270 000 kr totalt.

Vi ønskjer til sist å vise til at dei to andre medverknadsorgana har budsjett på 325 000 kr og 400 000 kr, sjølv om aktivitetsnivået antakeleg er mykje det same, og håpar å få velvilje for ein auking.